

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

27 Avril 2018
(10 Shabaan 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Remerciements à Allah & Bane Conseils (Partie 3) ».

Alhamdulillah, Summa Alhamdulillah, Allah (swt) fine donne moi le Ilm (la connaissance) et le Tawfeeq pou contigne troisième partie de mo Khutba lors bane Madames et bane Missiés de la Manifestation Divine. C'est en effet ene grand bénédiction d'Allah, ki Li fine guide moi à travers So l'amour et So bane bénédictions pour donne à tous bane membres de nous Jamaat et de l'humanité en entier l'essence clé de couma pou amène ene bon la vie et couma pou modeler li dans zot la vies spirituelles, de sorte ki saki temporaire et matériel pou sa la terre là, et saki spirituel capave marié en harmonie et ki zot pas rentre en conflit. En effet, tous bane remerciements et gratitudes appartenir à Allah ki fine enseigne moi et guide moi pour donne zot bane meilleurs conseils pour zot propre bien lors la terre et ki pou ouvert pou zot bane chemins de la félicité dans Aakhérat aussi. En vérité, mo l'amour pour Allah li tellement grand ki pas capave même compter.

Alors mo bane chers disciples, et tous bane musulmans du monde entier ainsi ki le reste de l'humanité, concernant le sujet de mo Khutba azordi, sa pou ene très grand malheur si la tyrannie et l'oppression contre bane madames contigner exister dans nous société actuelle. Le moment fine arriver pou enlève bane imperfections depuis le visage de

l'Islam. Faudé ki personne astaire pas noirci li de nouvo! Si, par suite de l'autorité de bane z'hommes, bane madames fine commence zot propre Mouvements de Libération dans ene tel façon ki zot détache zot du cercle de l'Islam et tous saki formes l'Islam et ki concerne la piété, alors c'est la faute de bane maris ki sa révolte là fine exposé. C'est bane époux de sa bane madames là ki responsables de sa. Tous bane missiés de sa catégorie là pou responsables devant Allah pour sa faute grave là. Bane l'exemples de sa répression mal intentionné contre bane madames zot variés et zot tellement nombreux ki pou capave compile ene volume (livre) complet lors là.

Le Jamaat Ul Sahih Al Islam li ene communauté ki fine être ordonné par Allah (swt) pour montrer lémonde ene façon de vivre - le mode de vie islamique - parski c'est sa même l'héritage ki pli précieux parmi tous bane héritages de l'homme. Nous capave faire bane grand grand progrès dans le domaine de l'éducation; nous capave faire bane zoli discours kot nous explique la philosophie de base de bane l'enseignements islamiques; mais le monde pas pou être attentif à séki nous dire, tanque ki nous bane paroles pas marcher ensam avec bane actions concrets. Rappel zot, ki c'est pas pour nannié ki nous bien-aimé prophète Hazrat Muhammad (saws) li connu et li pou toujours être connu comme le Coran en personne. Kifaire sa? Parski bane l'enseignements divines ki li ti pé prêcher ti pé réfléchir dans so la vie de tous les jours. Li ti ene l'exemple par excellence. Li ti l'incarnation du Quran lors la terre. Par conséquent, nous bizin touzour suivre so pas et vive l'Islam ki nous prêcher, sa même Islam ki Hazrat Muhammad (saws) fine également prêché et fine vive.

Alors mo révine lor le vif de mo sujet pour aujourd'hui; le statut de bane madames dans la société islamique li ene problème bien délicat. Li généralement reconnu ki ene missié ki pas ena respect, ki pas ena l'égard pour bane droits fondamental de l'homme et ki li manque de compassion et de la bonté, alors sa kalité z'homme là pas pou capave être inclu dans rangs de bane vrais musulmans.

Si ene tel dimoune penser ki malgré so méchanceté et so cruauté dans so la vie privée et dans so traitement brutal et violent de bane madames ki sans défense, ki li pou rentre dans Paradis couma ene vrai Musulman, alors li pé faire fausse route. Zamais li pou rentre dans Paradis - même si li faire beaucoup *Namaz* ou pas. Li capave trompe li-même kot li convaincre li-même ki li pou rentre dans Paradis, et li pou capave même vanter ki li ena ene place très proche avec Allah, et ki li pieux, mais so bane mauvais actions pou annule tous bane la prières (*Salat* et *Duahs*) ki li fine faire, et Allah pou interdit pou li l'accès au bonheur éternel (c'est-à-dire, dans paradis).

En effet, Paradis li réservé uniquement à bane vrais serviteurs du Saint Prophète Muhammad (saws). Bane familles avec bane ti moyens dans nous société, la majorité d'entre zot fine aplatti dans la misère et le manque. Bane zenfants pé né mais sa bane dimounes là zot pas ena assez l'argent pou asté bane nécessités de base de la vie pour sa bane ti zenfants là. Bane madames pauvres et bane zenfants pas capave dormi la nuit à cause ene l'armée moustiques ki faire zot létour. Et en plus de tous sa, ena bane l'épidémies fréquents ki pèse lourdement lors bane classes de bane dimounes ki pli pauvres.

Même si bane missiés zot bienveillants, mais c'est bane madames pauvres ki bane principales victimes et bane moulins de la misère et de la pauvreté broiye zot (fini zot) doucement doucement mais d'ene façon constant. Bane l'ouvraze la caze de tous les jours, bane la nuits agité ki zot bizin passer pou prend soins de zot bane petits ki malades et tous bane la nuits, ene après l'autre kot zot pas gagne aucaine repos zot forme partie de bane travaux difficile ki ene madame bizin accompli de main forte, tout seul tout au long de so la vie. Jugé par n'importe ki norme, c'est ene la vie dure et ki laisse ene l'impression permanent de difficulté et de misère derrière li. Ki Allah permette nous pou mette fin à sa misère là dans nous société.

Eski li donc pas inhumain ki l'homme ajoute de l'huile lor difé kan li transforme li en ene tyran dans so la vie privée et li servi bâton (c'est-à-dire, li brutal, sévère et dépasse borne dans autoritaire et kot même li frappe et blesse so madame); alors eski li pas inhumain kan li servi la brutalité pou régler ene problème au lieu servi la gratitude et la douceur? Ena bane maris ki accuse zot bane madames de bane actes immoral mais malgré sa entretenir bane relations conjugal normal avec zot et zot produire bane zenfants dans ene baze régulier. Bane tel mauvais missiés, ki zot seul but dans la vie c'est pou tourmente zot bane madames et pou créer ene l'enfer pour zot lor sa la terre là, sa bane tels missiés là pas mériter ki traite zot couma dimounes. Sa bane kalités z'hommes là pas capave prétendre ki zot ena kit relation avec l'Islam; et mo pé prévenir zot, sa bane kalités dimounes là pas pou capave prétendre ena kit connexion avec le Jamaat Ul Sahih Al Islam si zamais bane tels mauvais dimounes coumsa là zot prend naissance ou zot prend *Bai'at* (et intégrer) dans Jamaat Ul Sahih Al Islam. Dans bane cas pareil, sa bane dimounes là zot présence dans le Jamaat pou dans vide. Li pou nul. Rappel zot ki Jamaat Ul Sahih Al Islam li le renouveau de l'Islam de nous lé temps modernes. Zot pou vine bane vrais musulmans, bane vrai Sahih al Islam seulement kan zot pou mette en pratique bane l'enseignements de l'Islam de bonne foi et avec persévérance et attention, en prenant toujours bane précautions pour pas égare zot.

Mo appelle sa bane kalités dimounes ki mo fine fek mentionner là pou réforme zot tout de suite. Mo prévenir zot tous aussi dans nous Jamaat dans le monde entier pou pas vine ene peuple ki ena ene lécoeur aussi noir pareil. Faudé pas zot ena ene lécoeur noir ki pas ena kit respect et considération pour zot bane madames et bane femmes en général. Rappel-zot! Jamaat Ul Sahih Al Islam représente le vrai Islam. Si dans sa processus là, li pas produire bane spécimens (de bane dimounes) de la plus haute vertu, alors la victoire finale zamais pas pou vine pou nous. Nous pas ena ni le courage et ni nous capave laisse bane représentants du mals rouler ensam avec la caravane bénie du Jamaat Ul Sahih Al Islam.

Ki Allah (swt) guide nous tous vers le droit chemin, le chemin de la vérité et permette nous pou vine bane vrai Sahih al Islam. *Insha-Allah, Ameen.*